



Broj: JP-6/26

Datum: 12. august 2026. godine

Vijeće mladih Federacije Bosne i Hercegovine (u daljem tekstu: VMFBiH) u skladu sa Statutom, i propisanim internim pravilima i procedurama organizacije raspisuje:

JAVNI POZIV

za polaznike i polaznice treće generacije Akademije omladinske politike Bosne i Hercegovine

Znaš šta mladima nedostaje u tvojoj zajednici, ali nisi siguran/na kako pokrenuti inicijativu, kome se obratiti ili na koji način uticati na donošenje odluka?

Akademija omladinske politike Bosne i Hercegovine pruža ti znanje, podršku i prostor da svoju ideju razviješ u konkretnu zagovaračku inicijativu.

Ne tražimo da već znaš kako se pokreće inicijativa. Važno nam je da prepoznaješ problem, želiš učiti i spreman/na si djelovati.

Pozadina poziva

Akademija omladinske politike Bosne i Hercegovine (u daljem tekstu: Akademija) višemjesečni je razvojni, edukativno-zagovarački program namijenjen mladima koji žele bolje razumjeti političke procese, aktivnije učestvovati u donošenju odluka i pokretati konkretne promjene u svojim zajednicama.

Dugogodišnje iskustvo rada s mladima ukazalo je na značajan nedostatak programa koji se fokusiraju na prava mladih iz perspektive politika koje ih direktno dotiču. Stoga je Akademija osmišljena kao program koji ima za cilj osnažiti mlade ljude u preuzimanju vodećih uloga u svojim zajednicama, pri čemu poseban naglasak stavlja na stjecanje praktičnih vještina koje će im pomoći u ostvarivanju pozitivnih promjena.

VMFBiH je program prvi put realizovalo 2022. godine, a od 2024. godine Akademija okuplja mlade iz cijele Bosne i Hercegovine. Tokom 2024. i 2025. godine program je okupio ukupno 50 učesnika i učesnica iz više od 25 lokalnih zajednica, povezujući mlade iz različitih administrativnih, društvenih i iskustvenih okruženja.



Posebna vrijednost Akademije je povezivanje teorijskog znanja s praktičnim djelovanjem. Polaznici i polaznice, uz mentorsku podršku, razvijaju zagovaračke inicijative usmjerene na stvarne potrebe mladih. Među dosadašnjim inicijativama izdvajaju se zagovaranje izgradnje skejt parka u Banjoj Luci, uspostavljanja prostora za mlade u Orašju, osiguravanja budžetskih sredstava za inicijative mladih u Općini Novo Sarajevo, imenovanja službenika za mlade u Općini Bugojno, te mnoge druge značajne inicijative.

50

učesnika i učesnica
2024-2025

25+

lokalnih zajednica

4

modula
po generaciji

O Akademiji 2026/2027

Za generaciju 2026. VMFBiH će odabrati **20 polaznika i polaznica iz različitih dijelova BiH**. Program će biti realizovan kroz četiri međusobno povezana trodnevna modula, koji će uključivati praktične zadatke i razvoj zagovaračke inicijative između modula, uz individualnu podršku mentora. Moduli će biti realizovani u različitim gradovima Bosne i Hercegovine, a sadržaji modula i testiranje će se vršiti putem platforme Omladinski inkubator.

Program Akademije obuhvatit će sljedeće **tematske cjeline**:

- građanski, lokalni i omladinski aktivizam;
- politički sistem Bosne i Hercegovine i mehanizmi učešća mladih;
- politike prema mladima u Bosni i Hercegovini i međunarodnoj praksi;
- javno zagovaranje, politička participacija i saradnja s institucijama;
- komunikacija, timski rad i strateški pristup radu s mladima;
- razvoj i provođenje lokalne zagovaračke inicijative uz mentorsku podršku.

U zavisnosti od raspoloživih sredstava i partnerstava, Akademija može uključivati dodatne gostujuće sesije, studentske i kulturne posjete te finansijsku podršku za odabrane inicijative.

Šta dobijaš učešćem?

Od učešća u Akademiji možeš očekivati:

- bolje razumijevanje političkog sistema, politika prema mladima i rada institucija;
- praktične vještine javnog zagovaranja, komunikacije i saradnje s donosiocima odluka;



- individualnu mentorsku podršku pri razvoju vlastite inicijative;
- učenje od iskusnih trenera, praktičara i gostiju;
- priliku da kroz module upoznaš različite gradove u BiH;
- povezivanje s mladima iz različitih dijelova BiH;
- certifikat nakon uspješnog završetka programa.

Polaznici ranijih generacija nastavili su preuzimati odgovornije uloge u vijećima mladih, organizacijama civilnog društva, lokalnim inicijativama i procesima donošenja odluka.

Planirani raspored

Modul	Okvirni period
I modul	septembar 2026.
II modul	novembar 2026.
III modul	mart 2027.
IV modul	maj 2027.

Tokom trajanja modula planirano vrijeme rada je od 09.00 do 17.00 sati s izuzećem prvog i zadnjeg dana zbog dolaska i odlaska polaznika. Moduli se realizuju petkom, subotom i nedjeljom. Određeni segmenti modula potencijalno će biti realizovani online, putem interaktivne platforme Omladinski inkubator, a o čijim će terminima odabrani polaznici/e biti naknadno obaviješteni.

U zavisnosti od raspoloživih sredstava i partnerstava, program može uključivati gostujuće sesije, studijske i kulturne posjete te finansijsku podršku za odabrane inicijative.

Raspored održavanja modula Akademije nije konačan i VMFBiH zadržava pravo na njihovu izmjenu, a o mjestima održavanja će VMFBiH polaznike/ce obavijestiti naknadno.

Ko se može prijaviti?

Na Javni poziv mogu se prijaviti kandidati i kandidatkinje koje ispunjavaju sljedeće uslove:

- imaju od 18 do 30 godina u trenutku prijave;
- državljani su Bosne i Hercegovine i imaju prebivalište ili boravište u Bosni i Hercegovini;
- zainteresovani su za omladinske politike, društveni angažman i djelovanje u zajednici;



- aktivni su u omladinskoj ili drugoj organizaciji civilnog društva, vijeću mladih, neformalnoj grupi ili kroz druge oblike društvenog angažmana, ili žele započeti takav angažman;
- prepoznaju konkretan problem ili potrebu mladih u svojoj zajednici na kojoj žele raditi kroz zagovaračku inicijativu;
- spremni su prisustvovati svim modulima i učestvovati u aktivnostima između modula;
- dostave potpunu prijavu u predviđenom roku.

Prethodno iskustvo u omladinskom sektoru predstavlja prednost, ali nije uslov za prijavu. Posebno ohrabrujemo prijave mladih iz manjih i nedovoljno zastupljenih lokalnih zajednica, kao i mladih koji do sada nisu imali priliku učestvovati u sličnim programima.

Akademija je otvorena mladima različitih iskustava i oblika društvenog i političkog angažmana. Bez obzira na prethodno iskustvo i angažman, program se realizuje kao nestranački prostor za učenje, dijalog i razmjenu iskustava.

Kako se prijaviti?

Za prijavu na Akademiju potrebno je:

- popuniti online prijavni obrazac.

Prijavni obrazac, osim klasičnih pitanja, sadrži i nekoliko interaktivnih zadataka kroz koje želimo malo bolje upoznati način na koji razmišljaš i predstavljaš svoje ideje. Pojedini odgovori zahtijevat će kratki audio zapis ili grafički prikaz, koje ćeš moći napraviti direktno unutar prijavnog obrasca. Zato ti preporučujemo da za popunjavanje prijave izdvojiš dovoljno vremena i koristiš uređaj s funkcionalnim mikrofonom.

Online prijavni obrazac nalazi se [OVDJE](#).

Prijava se smatra potpunom nakon uspješnog popunjavanja i slanja online prijavnog obrasca. Dostavljanje CV-a je dobrovoljno i neće utjecati na potpunost prijave.

Poziv je otvoren do 30. augusta 2026. godine do 23:59 sati.

Kako birmo novu generaciju?

Pristigle prijave Komisija će ocjenivati na osnovu motivacije, kvaliteta i relevantnosti predložene ideje, spremnosti za aktivno učešće u cjelokupnom programu, te potencijala da stečena znanja budu primijenjena u lokalnoj zajednici. Prilikom konačnog odabira vodit će se računa o geografskoj, rodnoj i iskustvenoj raznolikosti grupe.



VMFBiH može pozvati uži krug kandidata i kandidatkinja na kratki **online razgovor**.

S odabranim polaznicima i polaznicama bit će potpisan **ugovor o učešću u programu** kojim se uređuju međusobne obaveze.

Važne informacije

- Učešće u Akademiji je besplatno.
- Odabranim polaznicima i polaznicama bit će osigurani smještaj, hrana, radni materijali i putni troškovi u skladu s pravilima VMFBiH.
- Prisustvo svim modulima i učešće u aktivnostima između modula obavezni su za uspješan završetak programa.
- Odabrane polaznici i polaznice ne mogu delegirati drugoj osobi prisustvo ili izvršavanje obaveza koje proizlaze iz programa.
- Detaljne informacije o logistici i načinu refundacije putnih troškova bit će dostavljene odabranim polaznicima i polaznicama.

Dodatne informacije

Poziv ostaje otvoren do **30. augusta 2026. godine u 23:59h**.

Pitanja u vezi s Javnim pozivom mogu se dostaviti putem e-maila na belmin.malagic@vijecemladih.ba ili telefonom na 033 204-104.

Nepotpune i nepravovremeno pristigle prijave neće biti uzete u razmatranje. Više informacija o radu VMFBiH dostupno je na www.vijecemladih.ba.

Napomena: Izrazi koji su radi preglednosti dati u jednom gramatičkom rodu u dokumentu bez diskriminacije se odnose jednako na osobe svih rodova.